

Uredbu o zahtjevima za proizvodnju, stavljanje u promet i upotrebu medicirane hrane za životinje*

Uredba je objavljena u "Službenom listu CG", br. 96/2026 od 6.7.2026. godine, a stupila je na snagu 14.7.2026.

* U ovu uredbu prenjeta je Regulativa (EU) 2019/4 Evropskog parlamenta i Vijeća od 11. decembra 2018. o proizvodnji, stavljanju na tržište i upotrebi medicirane hrane za životinje, o izmjeni Regulative (EZ) br. 183/2005 Evropskog parlamenta i Vijeća i o stavljanju izvan snage Direktive Vijeća 90/167/EEZ.

Predmet

Član 1

Ovom uredbom propisuju se bliži zahtjevi za proizvodnju i stavljanje u promet medicirane hrane za životinje i/ili intermedijarnih proizvoda, označavanje i pakovanje medicirane hrane za životinje, uvoz medicirane hrane za životinje.

Primjena

Član 2

(1) Ova uredba primjenjuje se na:

- 1) proizvodnju, skladištenje i prevoz medicirane hrane za životinje i intermedijarnih proizvoda;
- 2) stavljanje na tržište, uključujući uvoz iz drugih zemalja i upotrebu medicirane hrane za životinje i intermedijarnih proizvoda;
- 3) izvoz medicirane hrane za životinje i intermedijarnih proizvoda u druge zemlje.

(2) Ova uredba ne primjenjuje se na veterinarsko-medicinske proizvode koji su definisani propisima kojim se uređuju lijekovi, osim ako su takvi proizvodi uključeni u mediciranu hranu za životinje ili intermedijarni proizvod.

Značenje izraza

Član 3

Izrazi upotrijebljeni u ovoj uredbi imaju sljedeća značenja:

1) **medicirana hrana za životinje** je hrana za životinje pripremljena za direktnu ishranu životinja bez dalje prerade, koja se sastoji od homogene mješavine jednog veterinarsko-medicinskog proizvoda ili međuproizvoda ili više njih i hraniva ili krmne smješe;

2) **hrana za životinje** je supstanca ili proizvod, uključujući i dodatke hrani za životinje, aditive, bilo da je prerađena, djelimično prerađena ili neprerađena, a namijenjena je za peroralnu ishranu životinja (feed or feedingstuff);

3) **subjekat u poslovanju hranom** je pravno i fizičko lice ili preduzetnik koje je odgovorno za ispunjavanje propisanih zahtjeva za hranu u okviru djelatnosti koju obavlja;

4) **stavljanje na tržište** je posjedovanje hrane ili hrane za životinje u svrhu prodaje, uključujući i ponude za prodaju ili drugi oblik prenosa uz ili bez naknade, kao i prodaju, distribuciju i drugi oblik prenosa (placing on the market);

5) **dodatak hrani za životinje** su supstance, mikroorganizmi ili proizvodi, osim hraniva i premiksa, koji se dodaju hrani za životinje ili vodi, radi:

- postizanja povoljnih uticaja na svojstva hrane za životinje, proizvoda životinjskog porijekla i na boju ukrasnih ribica i ptica;

- zadovoljavanja nutritivnih potreba životinja;

- povoljnog uticaja na životnu sredinu pri uzgoju životinja;

- povoljnog uticaja na uzgoj životinja, proizvodnost ili dobrobit životinja, a naročito na želudačno crijevnu floru ili probavu; ili

- kokcidiostatskog i histomonostatskog uticaja;

6) **dnevni obrok** je prosjek ukupne količine hrane za životinje preračunate na 12% sadržaja vlage, koji predstavlja dnevnu potrebu životinje određene vrste, starosne kategorije i proizvodnje, koji je potreban za zadovoljenje svih njenih potreba;

7) **životinja koja se koristi za proizvodnju hrane** je životinja koja se hrani, uzgaja ili drži radi proizvodnje hrane za ishranu

ljudi, uključujući i pojedine životinje koje se ne koriste za ishranu ljudi, ali pripadaju životinjskoj vrsti koja se uobičajeno koristi za ishranu ljudi;

8) **životinja koja se ne koristi za proizvodnju hrane** je životinja koja se hrani, uzgaja i drži, ali se ne koristi za ishranu ljudi, poput krznašica, kućnih ljubimaca i životinja koje se drže u laboratorijama, zooološkim vrtovima ili cirkusima;

9) **krznaši** su životinje koje se ne koriste za proizvodnju hrane, držane ili uzgajane za proizvodnju krzna i koje se ne koriste za ishranu ljudi;

10) **hraniva** su proizvodi biljnog ili životinjskog porijekla, čija je osnovna namjena zadovoljenje hranidbenih potreba životinja u njihovom izvornom obliku, svježi ili konzervirani i proizvodi dobijeni njihovom industrijskom preradom, kao i organske ili neorganske supstance koje sadrže ili ne sadrže dodatke hrani za životinje, a namijenjene su za korištenje u peroralnoj ishrani životinja direktno kao takve, ili nakon prerade ili u pripremi krmnih smješa ili kao nosači premiksa;

11) **krmna smješa** je mješavina najmanje dva hraniva sa dodacima hrani za životinje ili bez njih, namijenjena peroralnoj ishrani životinja, u obliku potpune ili dopunske krmne smjese;

12) **potpuna krmna smješa je krmna smješa** koja svojim sastavom u potpunosti zadovoljava dnevni obrok;

13) **dopunska krmna smjesa** je krmna smješa koja ima visok udio određenih supstanci, ali po svom sastavu dovoljna je za dnevni obrok jedino ako se koristi u kombinaciji sa drugom hranom za životinje;

14) **mineralna mješavina** je dopunska krmna smjesa koja sadrži najmanje 40 % sirovog pepela;

15) **minimalni rok trajanja** je rok tokom kojeg lice odgovorno za označavanje garantuje da je hrana za životinje skladištena u odgovarajućim uslovima i da zadržava svoja označena svojstva, a za hranu za životinje kao cjelinu može da bude naznačen samo minimalni rok trajanja, a određuje ga se na temelju minimalnog roka trajanja svakog sastojka;

16) **šarža ili serija** je određena količina hrane za životinje koja ima zajednička svojstva, kao što su: porijeklo, vrsta hrane za životinje, vrsta pakovanja, pakiralac, pošiljalac ili označivanje, a u slučaju proizvodnog procesa to je jedinica proizvodnje iz pojedinog objekta koji koristi jedinstvene proizvodne parametre ili više takvih jedinica kada se proizvode u neprekinutom nizu i zajedno se skladište;

17) **označavanje** je navođenje riječi, podataka, zaštitnih znakova, zaštićenih imena, slika ili simbola na hrani za životinje, stavljanjem informacije na bilo koji medij koji se odnosi ili prati tu hranu za životinje (pakovanje, kontejneri, obavještenja, oznake, dokumenti, prsten, privjesnicu ili internet, uključujući i svrhu oglašavanja);

18) **oznaka** je bilo koja markica, zaštitni znak, žig, slikovni ili neki drugi opisni način, pisani, štampani, šablonski, istaknuti, reljefni, utisnut ili pričvršćen na pakovanje ili kontejner hrane za životinje;

19) **objekat** je poslovna jedinica u kojoj se obavlja poslovanje hranom za životinje;

20) **službena kontrola** je svaki oblik aktivnosti koju sprovode nadležni organi u skladu sa podjelom nadležnosti kome je nadležni organ povjerio određene poslove službenih kontrola ili određene poslove povezane sa drugim službenim aktivnostima, radi verifikacije usaglašenosti subjekata, životinja ili roba, uključujući i one koji se odnose na izdavanje službenog sertifikata ili službene potvrde;

21) **veterinarsko-medicinski proizvod** je proizvod koji se stavlja u promet u određenoj jačini, farmaceutskom obliku i pakovanju, a koji sadrži supstancu ili kombinaciju supstanci za koju se pokazalo da ima svojstvo da liječi ili sprečava bolesti kod životinja, kao i supstancu ili kombinaciju supstanci, koja se može koristiti ili primjenjivati na životinjama, bilo sa namjerom da se ponovo uspostavi, poboljša ili izmijeni fiziološka funkcija putem farmakološkog, imunološkog ili metaboličkog dejstva ili da se postavi medicinska dijagnoza (VMP);

22) **aktivna supstanca** je bilo koja supstanca ili kombinacija supstanci, koja se koristi u proizvodnji lijeka i koja tako postaje aktivni sastojak proizvedenog lijeka, a namjena joj je da utiče na farmakološku aktivnost ili da na drugi način direktno utiče na dijagnostiku, liječenje, ublažavanje, njegu, prevenciju bolesti ili da utiče na strukturu ili funkcije organizma;

23) **imunološki veterinarski lijek** je veterinarski lijek namijenjen primjeni kod životinje u svrhu stvaranja aktivne ili pasivne imunosti ili dijagnostikovanja njenog imunološkog stanja;

24) **antimikrobna supstanca** je supstanca sa direktnim dejstvom na mikroorganizme, koja se upotrebljava za liječenje ili sprečavanje infekcija ili zaraznih bolesti uključujući antibiotike, antiviralna sredstva, antimikotike i antiprotozoike;

25) **antiparazitik** je supstanca koja ubija ili prekida razvoj parazita i upotrebljava se za liječenje ili sprečavanje infekcije, infestacije ili bolesti koju izazivaju ili prenose paraziti, uključujući i supstance sa repelentnim dejstvom;

26) **antibiotik** je svaka materija sa djelovanjem na bakterije, koja se upotrebljava za liječenje ili sprečavanje infekcija ili zaraznih bolesti;

27) **profilaksa** je davanje lijeka životinji ili grupi životinja prije pojave kliničkih znakova bolesti, da bi se spriječio nastanak bolesti ili zaraze;

28) **metafilaksa** je davanje lijeka grupi životinja nakon što je za dio grupe postavljena klinička dijagnoza bolesti, u cilju liječenja klinički oboljelih životinja i kontrolisanja širenja bolesti na životinje koje su u bliskom kontaktu i ugrožene i koje bi već mogle da budu subklinički zaražene;

29) **karenca** je minimalni period između posljednje primjene veterinarskog lijeka na životinji i proizvodnje hrane od te životinje, koji pod normalnim uslovima upotrebe obezbjeđuje da hrana ne sadrži ostatke u količinama štetnim za zdravlje ljudi;

30) **intermedijarni proizvod** je hrana za životinje koja nije pripremljena za direktno hranjenje životinja bez dalje prerade i koja se sastoji od homogene mješavine jednog veterinarsko-medicinskog proizvoda ili više njih i hraniva ili krmne smješe, isključivo namijenjena za upotrebu u proizvodnji medicinirane hrane za životinje;

31) **neciljana hrana** za životinje je hrana za životinje, medicinirana ili ne, koja ne bi trebala da sadrži određenu aktivnu supstancu;

32) **unakrsna kontaminacija** je kontaminacija neciljane hrane za životinje nekom aktivnom supstancom porijeklom iz prethodne upotrebe objekata ili opreme;

33) **subjekat u poslovanju hranom za životinje** je fizičko ili pravno lice odgovorno za obezbjeđivanje ispunjavanja propisanih zahtjeva za hranu za životinje u okviru djelatnosti koju obavlja;

34) **pokretna mješaonica** je subjekt u poslovanju hranom za životinje sa objektom za proizvodnju hrane za životinje u obliku posebno opremljenog vozila za proizvodnju medicinirane hrane za životinje;

35) **mješaona na poljoprivrednom gazdinstvu** je subjekt u poslovanju hranom samo u slučaju proizvodnje medicinirane hrane za životinje sa dodatim ljekovima za isključivu upotrebu na svom poljoprivrednom gazdinstvu;

36) **veterinarski recept za mediciniranu hranu za životinje** je dokument koji izdaje veterinar za mediciniranu hranu za životinje;

37) **oglašavanje** je predstavljanje u bilo kojem obliku medicinirane hrane za životinje i intermedijarnih proizvoda radi reklamiranja propisivanja recepata ili upotrebe medicinirane hrane za životinje, uključujući i snabdijevanje uzorcima i sponzorstva;

38) **držalac životinja** je fizičko ili pravno lice koje je trajno ili privremeno odgovorno za životinje.

Zahtjevi u poslovanju hranom za životinje

Član 4

(1) Subjekti u poslovanju hranom za životinje proizvode, skladište, prevoze i stavljaju u promet mediciniranu hranu za životinje i intermedijarne proizvode u skladu sa Prilogom 1.

(2) Na poljoprivrednike koji kupuju, skladište ili prevoze mediciniranu hranu za životinje isključivo za upotrebu na svom poljoprivrednom gazdinstvu primjenjuje se Priloga 1 (Dio 5).

(3) Na snabdijevanje intermedijarnim proizvodima i mediciniranom hranom za životinje primjenjuju se propisi kojima se uređuju veterinarsko-medicinski proizvodi.

Sastav medicinirane hrane i intermedijarnih proizvoda

Član 5

(1) Medicinirana hrana za životinje i intermedijarni proizvodi proizvode se samo od veterinarsko-medicinskih proizvoda, uključujući veterinarsko-medicinske proizvode namijenjene za primjenu i odobrenih za proizvodnju medicinirane hrane za životinje, u skladu sa propisima kojima se uređuju ljekovi.

(2) Subjekt u poslovanju hranom za životinje koji proizvodi mediciniranu hranu za životinje ili intermedijarni proizvod obezbjeđuje da:

1) se medicinirana hrana za životinje ili intermedijarni proizvodi proizvode u skladu sa uslovima utvrđenim u veterinarskom receptu za mediciniranu hranu za životinje ili u slučajevima iz člana 8 ove uredbe, za veterinarsko-medicinske proizvode koji se dodaju hrani za životinje;

2) veterinarski recept sadrži podatke o poznatim međudjelovanjima veterinarsko-medicinskih proizvoda i hrane za životinje koja mogu dovesti do smanjenja bezbjednosti ili efikasnosti medicinirane hrane za životinje ili međuproizvoda;

3) se dodatak hrani za životinje odobren kao kokcidiostatik ili histomonostatik, za koji je određena najveća dozvoljena količina, ne dodaje mediciniranoj hrani za životinje ili intermedijarnom proizvodu ako je već upotrijebljen kao aktivna supstanca u veterinarsko-medicinskom proizvodu;

4) ako se ista aktivna supstanca nalazi u veterinarsko-medicinskom proizvodu i u dodatku hrani za životinje sadržanom u toj hrani za životinje, ukupna količina te aktivne supstance u mediciniranoj hrani za životinje ne premašuje najveću dopuštenu količinu utvrđenu u veterinarskom receptu za mediciniranu hranu za životinje ili;

5) se veterinarsko-medicinski proizvodi dodati u hranu za životinje sa njom kombinuju kako bi činili stabilnu smjesu tokom cijelog roka trajanja medicinirane hrane za životinje u skladu sa propisima kojim se uređuju ljekovi, pod uslovom da se medicinirana hrana za životinje ili intermedijarni proizvod ispravno skladište i da se njima pravilno rukuje.

(3) Subjekti u poslovanju hranom za životinje, koji držaoce životinja snabdijevaju mediciniranom hranom za životinje obezbjeđuju da je ta medicinirana hrana za životinje u skladu sa veterinarskim receptom.

Homogenost

Član 6

(1) Subjekti u poslovanju hranom za životinje koji proizvode mediciniranu hranu za životinje ili intermedijarne proizvode, dužni su da obezbjeđe homogenu raspršenost veterinarsko medicinskog proizvoda u mediciniranoj hrani za životinje i u intermedijarnom proizvodu.

(2) Kriterijume za homogenu raspršenost veterinarsko medicinskog proizvoda u mediciniranoj hrani za životinje ili intermedijarnom proizvodu određuju se u zavisnosti od specifičnih svojstva veterinarsko-medicinskih proizvoda i tehnologije za miješanje.

Unakrsna kontaminacija

Član 7

(1) Subjekti u poslovanju hranom za životinje koji proizvode, skladište, prevoze ili stavljaju na tržište mediciranu hranu za životinje ili intermedijarne proizvode, dužni su da postupaju u skladu sa članom 4 ove uredbe, radi izbjegavanja unakrsne kontaminacije, koja se utvrđuje testom kroskontaminacije.

(2) Za aktivne supstance u veterinarsko-medicinskom proizvodu, koje su iste kao supstance u dodatku hrani za životinje, najveći dozvoljeni nivo unakrsne kontaminacije u neciljanoj hrani za životinje je najveća dozvoljena količina dodatka hrani za životinje u potpunoj krmnoj smješi u skladu sa propisom o maksimalno dozvoljenim količinama nepoželjnih supstanci u hrani za životinje.

Predviđena proizvodnja

Član 8

(1) Medicinirana hrana za životinje i intermedijarni proizvodi mogu da se proizvode i stavljaju u promet prije izdavanja recepta, osim u slučaju snabdijevanja držalaca životinja.

(2) Odredba stava 1 ovog člana ne primjenjuje se na:

- 1) mješaonice na poljoprivrednim gazdinstvima i pokretne mješaonice;
- 2) proizvodnju medicinirane hrane za životinje i intermedijarne proizvode, koji sadrže veterinarsko-medicinske proizvode namijenjene za primjenu u skladu sa propisima kojima se uređuju lijekovi.

Posebni zahtjevi za označavanje

Član 9

(1) Označavanje medicinirane hrane za životinje i intermedijarnih proizvoda, vrši se u skladu sa Prilogom 3.

(2) Označivanje hraniva i krmnih smješa primjenjuju se na mediciranu hranu za životinje i međuproizvode, koji sadrže hraniva odnosno krmne smješe u skladu sa propisima koji regulišu stavljanje na tržište i upotrebu hrane za životinje.

(3) Ako se umjesto pakovanja upotrebljavaju kontejneri, uz njih se prilaže dokument koji je u skladu sa stavom 1 ovog člana.

(4) Dozvoljena odstupanja sadržaja aktivne supstance u mediciniranoj hrani za životinje i intermedijarnim proizvodima, navedenih na oznaci, od sadržaja dobijenog analizom pri službenim kontrolama data su u Prilogu 4.

Pakovanje medicinirane hrane i intermedijarnih proizvoda

Član 10

(1) Medicinirana hrana za životinje i intermedijarni proizvodi, stavljaju se na tržište samo u zapečaćenim pakovanjima ili kontejnerima.

(2) Pakovanja ili kontejneri pečate se tako da se pri otvaranju pakovanja ili kontejnera pečat ošteti da se ne može ponovo upotrijebiti.

(3) Pakovanja u kojima se nalazila medicinirana hrana i intermedijarni proizvodi ne smiju se ponovo upotrebljavati.

(4) Odredbe st. 1, 2 i 3 ovog člana, ne primjenjuje se na pokretne mješaonice, kojima se držaoci životinja direktno snabdijevaju mediciniranom hranom za životinje.

Oglašavanje medicinirane hrane za životinje i intermedijarnih proizvoda

Član 11

(1) Zabranjuje se oglašavanje medicinirane hrane za životinje i intermedijarnih proizvoda, osim u slučaju oglašavanja koje je namijenjeno isključivo veterinarima.

(2) Oglašavanje ne smije uključivati informacije koje bi mogle da dovedu u zabludu ili do nepravilne upotrebe medicinirane hrane za životinje.

(3) Medicinirana hrana za životinje ne smije se distribuirati u promotivne svrhe, osim u malim količinama u obliku uzoraka.

(4) Medicinirana hrana za životinje koja sadrži antimikrobne veterinarsko-medicinske proizvode ne smije da se distribuira u promotivne svrhe u obliku uzoraka ni u bilo kojem drugom obliku.

(5) Uzorci iz stava 3 ovog člana, moraju da budu označeni na odgovarajući način, tako da se jasno vidi da je riječ o uzorcima i distribuiraju se samo direktno veterinarima tokom sponzorisanih događaja ili posjeta trgovačkih zastupnika.

Uvoz medicinirane hrane za životinje i intermedijarnih proizvoda

Član 12

Subjekat u poslovanju hranom za životinje koji uvozi mediciranu hranu za životinje i intermedijarne proizvode u Crnu

Goru, dužan je da obezbijedi da su veterinarsko medicinski proizvodi upotrijebljeni za proizvodnju te medicinirane hrane za životinje i intermedijarnih proizvoda dozvoljeni za upotrebu u Crnoj Gori u skladu sa propisom kojim se uređuju lijekovi.

Odobranje objekata za proizvodnju, skladištenje i prevoz i stavljanje na tržište medicinirane hrane za životinje i intermedijarnih proizvoda

Član 13

(1) Subjekti u poslovanju hranom za životinje koji proizvode, skladište, prevoze ili stavljaju na tržište mediciniranu hranu za životinje ili intermedijarne proizvode, dužni su da obezbijede da objekti pod njihovom kontrolom imaju odobrenje.

(2) Odredbe stav 1 ovog člana, ne primjenjuje se na subjekte u poslovanju hranom za životinje koji:

- a) kupuju, skladište ili prevoze mediciniranu hranu za životinje za isključivu upotrebu na svom poljoprivrednom gazdinstvu;
- b) djeluju isključivo kao trgovci i ne čuvaju mediciniranu hranu za životinje ili međuproizvode u svojim prostorijama;
- c) prevoze ili skladište mediciniranu hranu za životinje ili međuproizvode isključivo u zapečaćenim pakovanjima ili kontejnerima.

(3) Organ uprave nadležan za bezbjednost hrane, odobrava objekte iz stava 1 ovog člana, samo ako se prilikom posjete lokaciji, prije započinjanja odgovarajuće djelatnosti, pokaže da uspostavljeni sistem za proizvodnju, skladištenje, prevoz ili stavljanje na tržište medicinirane hrane za životinje ili intermedijarnih proizvoda ispunjava posebne zahtjeve iz čl. 4 do 12 ove uredbe.

(4) Kad je riječ o trgovcima na malo koji trguju mediciniranom hranom za životinje za kućne ljubimce i držaocima krznašica, koji hrane životinje mediciniranom hranom za životinje, Crna Gora treba da uspostavi nacionalne postupke kojima se obezbjeđuje da su relevantne informacije o njihovim djelatnostima dostupne nadležnim tijelima, pritom izbjegavajući udvostručavanje posla i nepotrebno administrativno opterećenje.

Registar odobrenih objekata

Član 14

Objekti odobreni u skladu sa članom 13 ove uredbe, evidentiraju se u Registru odobrenih objekata, sa pripadajućim brojem odobrenja u skladu sa propisima koji uređuju higijenu hrane za životinje.

Veterinarski recept za mediciniranu hranu za životinje

Član 15

(1) Držalac životinja snabdijeva se mediciniranom hranom za životinje:

1) prilikom prezentacije i u slučaju proizvodnje u mješaonicama na poljoprivrednim gazdinstvima, posjedovanjem veterinarskog recepta za mediciniranu hranu za životinje;

2) u skladu sa uslovima iz st. 2 do 10 ovog člana.

(2) Veterinarski recept se izdaje nakon što veterinar obavi klinički pregled ili drugu odgovarajuću procjenu zdravstvenog stanja životinje ili grupe životinja i samo za dijagnostifikovanu bolest.

(3) Izuzetno od stava 2 ovog člana, recept koji sadrži imunološke veterinarsko-medicinske proizvode, može da se izda i ako nije dijagnostifikovana bolest.

(4) Izuzetno od stava 2, ovog člana, ako nije moguće potvrditi prisutnost dijagnostikovane bolesti, veterinarski recept za mediciniranu hranu za životinje koja sadrži antiparazitike bez antimikrobnog dejstva, može da se izda na osnovu saznanja o zaraženosti životinje ili grupe životinja parazitima.

(5) Veterinarski recept za mediciniranu hranu za životinje sadrži informacije date u Prilogu 5.

(6) Originalni veterinarski recept za mediciniranu hranu za životinje čuva proizvođač ili u zavisnosti od slučaja, subjekt u poslovanju hranom za životinje koji snabdijeva držaoca životinja mediciniranom hranom za životinje, a veterinar koji je izdao recept i držalac životinja koje se koristi za proizvodnju hrane ili krznašica zadržavaju primjerak veterinarskog recepta za mediciniranu hranu za životinje.

(7) Originali i kopije veterinarskog recepta čuvaju se pet godina od datuma izdavanja.

(8) Medicinirana hrana za životinje namijenjene životinjama koje se ne koriste za proizvodnju hrane, osim za krznašice, ne smije se upotrebljavati za više od jednog liječenja na osnovu istog veterinarskog recepta.

(9) Trajanje liječenja životinja, mora da bude u skladu sa opisom svojstava veterinarsko- medicinskog proizvoda u hrani za životinje, ako nije drukčije propisano.

(10) Liječenje životinja ne smije da bude duže od mjesec dana, odnosno dvije nedjelje u slučaju medicinirane hrane za životinje, koja sadrži antibiotske veterinarsko medicinske proizvode.

(11) Veterinarski recept važi najviše šest mjeseci od dana izdavanja za životinje koje se ne koriste za proizvodnju hrane, osim za krznašice i najviše tri nedjelje za životinje koje se koriste za proizvodnju hrane i krznašice, a u slučaju medicinirane hrane za životinje koja sadrži antimikrobne veterinarsko-medicinske proizvode, recept važi najviše pet dana

od dana izdavanja.

(12) Veterinar koji izdaje recept:

- 1) provjerava da li je to liječenje opravdano za određene životinje;
- 2) obezbjeđuje da primjena veterinarsko-medicinskog proizvoda nije nespojiva sa drugim oblikom liječenja ili upotrebom i da nema kontraindikacija i međudjelovanja u slučaju da se upotrebljava nekoliko proizvoda;
- 3) ne smije propisati mediciniranu hranu za životinje koja ima više od jednog veterinarsko-medicinskog proizvoda koji sadrži antimikrobne supstance.

(13) Recept mora da:

- 1) bude u skladu sa opisom svojstava veterinarsko-medicinskog proizvoda, osim u slučaju veterinarsko-medicinskih proizvoda namijenjenim za primjenu u skladu sa propisima kojim se uređuju lijekovi;
- 2) ima naznačenu dnevnu dozu veterinarsko-medicinskog proizvoda koji treba da se doda određenoj količini medicinirane hrane za životinje kako bi životinja dobila odgovarajuću dozu, uzimajući u obzir da se unos hrane oboljele životinje može razlikovati od uobičajene dnevne porcije;
- 3) obezbjedi da medicinirana hrana za životinje koja sadrži predviđenu dozu veterinarsko-medicinskog proizvoda odgovara količini od najmanje 50% dnevnog unosa hrane za životinje na osnovu suve materije i da se, u slučaju preživara, dnevna doza veterinarsko-medicinskog proizvoda dodaje u najmanje 50% dopunske krmne smješe, osim mineralne mješavine;
- 4) ima naznačenu stopu uključivanja aktivnih supstanci koja se izračunava na osnovu odgovarajućih parametara.

Upotreba medicinirane hrane za životinje

Član 16

(1) Propisana medicinirana hrana za životinje upotrebljava se samo za životinje za koje je veterinarski recept za mediciniranu hranu za životinje izdat u skladu sa članom 15 ove uredbe.

(2) Držalac životinja;

- 1) upotrebljava mediciniranu hranu za životinje isključivo u skladu sa veterinarskim receptom;
- 2) preduzima mjere kojima se izbjegava unakrsna kontaminacija;
- 3) obezbjeđuje da samo životinje navedene u veterinarskom receptu za mediciniranu hranu za životinje dobijaju mediciniranu hranu za životinje;
- 4) obezbjeđuje da se ne upotrebljava medicinirana hrana za životinje kojoj je istekao rok trajanja.
- (3) Medicinirana hrana za životinje koja sadrži antimikrobne veterinarsko-medicinske proizvode upotrebljava se u skladu sa propisom kojim se uređuju lijekovi, osim za profilaksu.
- (4) Medicinirana hrana za životinje koja sadrži imunološke veterinarsko-medicinske proizvode upotrebljava se u skladu sa propisom kojim se uređuju lijekovi.
- (5) Medicinirana hrana za životinje koja sadrži antiparazitike upotrebljava se na osnovu recepta izdatog u skladu sa članom 15 stav 4 ove uredbe.
- (6) Prilikom upotrebe medicinirane hrane za životinje koja se koristi za proizvodnju hrane, držalac životinja obezbjeđuje usklađenost sa karencom koja je navedena u receptu.
- (7) Držalac životinja koji koristi životinje za proizvodnju hrane i koji te životinje hrani mediciniranom hranom za životinje, vodi evidenciju u skladu sa propisom kojim se uređuju lijekovi i tu evidenciju čuva najmanje pet godina od dana primjene medicinirane hrane za životinje.

Sistemi za prikupljanje ili uklanjanje neiskorištenih proizvoda ili proizvoda kojima je istekao rok trajanja

Član 17

Subjekti u poslovanju hranom za životinje obezbjeđuju da se medicinirana hrana za životinje:

- 1) neživotinjskog porijekla i intermedijarni proizvodi koji nijesu iskorišćeni ili im je istekao rok upotrebe sakupljaju i uklanjaju kao rizični otpad u skladu sa propisom kojim se uređuje upravljanje otpadom;
- 2) životinjskog porijekla i medicinirana hrana za životinje koja sadrži supstance životinjskog porijekla, kao i intermedijarni proizvodi koji nisu iskorišćeni ili im je istekao rok upotrebe, sakupljaju i uklanjaju kao životinjski nus proizvod kategorije 2 u skladu sa propisima kojima se uređuju nus proizvodi životinjskog porijekla.

Novčane kazne

Član 18

Novčanom kaznom u iznosu od 500 eura do 10.000 eura kazniće se za prekršaj pravno lice, ako:

- 1) proizvodi, skladišti, prevozi i stavlja u promet mediciniranu hranu za životinje i intermedijarne proizvode suprotno zahtjevima iz Priloga 1, koji je sastavni dio ove uredbe (član 4 stav 1);
- 2) na poljoprivrednike koji kupuju, skladište ili prevoze mediciniranu hranu za životinje isključivo za upotrebu na svom poljoprivrednom gazdinstvu primjenjuje se Priloga 1 (Dio 5) (član 4 stav 2);

3) na snabdijevanje intermedijarnim proizvodima i mediciniranom hranom za životinje primjenjuju se propisi kojima se uređuju veterinarsko-medicinski proizvodi. (član 4 stav 2);

4) ne obezbijedi da se medicinirana hrana za životinje i intermedijarni proizvodi proizvode od veterinarsko-medicinskih proizvoda, uključujući veterinarsko-medicinske proizvode namijenjene za primjenu i odobrenih za proizvodnju medicinirane hrane za životinje, u skladu sa propisima kojima se uređuju lijekovi (član 5 stav 1);

5) proizvode mediciniranu hrane za životinje ili intermedijarne proizvode, a ne obezbijede homogenu raspršenost veterinarsko-medicinskog proizvoda u mediciniranoj hrani za životinje i u intermedijarnom proizvodu (član 6 stav 1);

6) prilikom proizvodnje, skladištenja, prevoza ili stavljanja na tržište medicinirane hrane za životinje i intermedijarnih proizvoda ne primjenjuje mjere u skladu sa članom 4 ove uredbe radi izbjegavanja unakrsne kontaminacije, koja se utvrđuje testom kroskontaminacije (član 7 stav 1);

7) snabdijeva držaoca životinja mediciniranom hranom za životinje i intermedijarnim proizvodom prije izdavanja veterinarskog recepta (član 8 stav 1);

8) ne vrši označavanje medicinirane hrane za životinje i intermedijarnih proizvoda u skladu sa Prilogom 3, koji je sastavni dio ove uredbe (član 9 stav 1);

9) medicinirana hrana za životinje i intermedijarni proizvodi stavljaju se u promet samo u zapečaćenim pakovanjima ili kontejnerima i pečate se tako da se pri otvaranju pakovanja ili kontejnera pečat ošteti i ne može se ponovno upotrijebiti (član 10 stav 1);

10) oglašava mediciniranu hrane za životinje i intermedijarne proizvode (član 11 stav 1);

11) oglašavanje uključuje informacije koje bi mogle da dovedu u zabludu ili do nepravilne upotrebe medicinirane hrane za životinje (član 11 stav 2);

12) mediciniranu hranu za životinje distribuira u promotivne svrhe, osim u malim količinama u obliku uzoraka (član 11 stav 3);

13) mediciniranu hranu za životinje koja sadrži antimikrobne veterinarsko-medicinske proizvode distribuira u promotivne svrhe u obliku uzoraka ili u bilo kojem drugom obliku (član 11 stav 4);

14) uzorci medicinirane hrane za životinje nijesu označeni na odgovarajući način, tako da se jasno vidi da je riječ o uzorcima i ne distribuiraju se samo direktno veterinarima tokom sponzorisanih događaja ili posjeta trgovačkih zastupnika (član 11 stav 5);

15) uvozi mediciniranu hranu za životinje i intermedijarne proizvode u Crnu Goru, za koju nije obezbijedio da su veterinarsko-medicinski proizvodi upotrijebljeni za proizvodnju te medicinirane hrane za životinje i intermedijarnih proizvoda dozvoljeni za upotrebu u Crnoj Gori u skladu sa propisom kojim se uređuju lijekovi (član 12);

16) se medicinirana hrana za životinje koja sadrži antimikrobne veterinarsko-medicinske proizvode upotrebljava suprotno propisu kojim se uređuju lijekovi (član 16 stav 3);

17) se medicinirana hrana za životinje koja sadrži imunološke veterinarsko-medicinske proizvode upotrebljava suprotno propisu kojim se uređuju lijekovi (član 16 stav 4);

18) prilikom upotrebe medicinirane hrane za životinje koja se koristi za proizvodnju hrane, držalac životinja ne obezbijedi usklađenost sa karencom koja je navedena u receptu (član 16 stav 6);

19) ne vodi evidenciju u skladu sa propisom kojim se uređuju lijekovi i tu evidenciju ne čuva najmanje pet godina od dana primjene medicinirane hrane za životinje (član 16 stav 7);

20) ne obezbijedi da se medicinirana hrana za životinje, neživotinjskog porijekla i intermedijarni proizvodi koji nisu iskorišćeni ili im je istekao rok upotrebe sakupljaju i uklanjaju kao rizični otpad u skladu sa propisom kojim se uređuje upravljanje otpadom i/ili životinjskog porijekla i medicinirana hrana za životinje koja sadrži supstance životinjskog porijekla, kao i intermedijarni proizvodi koji nisu iskorišćeni ili im je istekao rok upotrebe, sakupljaju i uklanjaju kao životinjski nus proizvod kategorije 2 u skladu sa propisima kojima se uređuju nus proizvodi životinjskog porijekla (član 17);

(2) Za prekršaje iz stava 1 ovog člana kazniće se preduzetnik novčanom kaznom u iznosu od 150 eura do 3.000 eura.

(3) Za prekršaje iz stava 1 ovog člana kazniće se odgovorno lice u pravnom licu novčanom kaznom u iznosu od 30 eura do 1.000 eura.

(4) Za prekršaje iz stava 1 ovog člana kazniće se fizičko lice novčanom kaznom u iznosu od 30 eura do 1.000 eura.

Prilozi

Član 19

Prilozi 1 do 5 čine sastavni dio ove uredbe.

Prestanak važenja

Član 20

Danom stupanja na snagu ove uredbe prestaje da važi Uredba o zahtjevima za proizvodnju i stavljanje u promet medicinirane hrane za životinje* ("Službeni list CG", broj 51/17).

Stupanje na snagu

Član 21

Ova uredba stupa na snagu osmog dana od dana objavljivanja u "Službenom listu Crne Gore".

Broj: 11-011/26-2113/2

Podgorica, 28. maja 2026. godine

Vlada Crne Gore

Predsjednik,
mr **Milojko Spajić**, s.r.

PRILOG 1

POSEBNI ZAHTEJEVI ZA SUBJEKTE U POSLOVANJU HRANOM ZA ŽIVOTINJE U SKLADU

Dio 1

Objekti i oprema

(1) Subjekti u poslovanju hranom za životinje obezbjeđuju da se objekti, oprema i njihovo neposredno okruženje održavaju čistim, u pisanom obliku izrađuju se planovi čišćenja kako bi se obezbjedilo da se svaka kontaminacija, uključujući unakrsnu kontaminaciju, svede na najmanju moguću mjeru.

(2) Subjekti u poslovanju hranom za životinje obezbjeđuju da pristup svim objektima bude ograničen na ovlašćeno lice.

Dio 2

Osoblje

(1) Subjektat u poslovanju hranom za životinje određuje odgovorno lice koje je osposobljeno za proizvodnju i stavljanje na tržište medicirane hrane za životinje i intermedijarnih proizvoda i za snabdijevanje držalaca životinja mediciranom hranom za životinje i intermedijarnim proizvodima, a takođe određuje odgovorno lice osposobljeno za kontrolu kvaliteta.

(2) Izuzetno od pokretnih mješaonica i mješaonica na poljoprivrednim gazdinstvima, funkcije odgovornog lica za proizvodnju i odgovornog lica za kontrolu kvaliteta međusobno su nezavisne i zbog toga ih ne obavlja isto lice.

Dio 3

Proizvodnja

(1) Subjekti u poslovanju hranom za životinje vode računa o zahtjevima u okviru relevantnih sistema za provjeru kvaliteta i dobre proizvođačke prakse, razvijenim u skladu sa propisima o higijeni hrane za životinje.

(2) Medicinirana hrana za životinje i intermedijarni proizvodi skladište se odvojeno od druge hrane za životinje kako bi se izbjegla unakrsna kontaminacija.

(3) Veterinarsko medicinski proizvodi skladište se u zasebnoj i bezbjednoj prostoriji na način koji ne utiče na njihova svojstva.

(4) Materijal koji se koristi za čišćenje proizvodne linije nakon proizvodnje medicirane hrane za životinje ili intermedijarnih proizvoda identifikuje se i skladišti i sa njime se rukuje na način koji ne utiče na bezbjednost i kvalitet hrane za životinje.

Dio 4

Kontrola kvaliteta

(1) Plan kontrole kvaliteta izrađuje se u pisanom obliku i sprovodi, a plan uključuje posebno provjere kritičnih tačaka u proizvodnom procesu, postupke uzorkovanja i njihovu učestalost, metode analize i njihovu učestalost, usklađenost sa specifikacijama za mediciranu hranu za životinje i intermedijarne proizvode, mjere koje treba preduzeti u slučaju neusklađenosti i utvrđuju se pravila o podjeli proizvodnje ili nepodudarnosti proizvodnih postupaka i, kad je to primjenjivo, utvrđuje potreba za posebnim proizvodnim linijama.

(2) Posebnim redovnim sopstvenim provjerama, kao i ispitivanjem stabilnosti, obezbjeđuje se usklađenost sa kriterijumima homogenosti, sa najvećim dopuštenim nivoima unakrsne kontaminacije za aktivne supstance u neciljanoj hrani za životinje utvrđenim u skladu sa ovom uredbom i sa minimalnim rokom trajanja medicirane hrane za životinje i intermedijarnih proizvoda.

Dio 5

Skladištenje i prevoz

(1) Medicinirana hrana za životinje i intermedijarni proizvodi skladište se u odgovarajućim zasebnim i bezbjednim objektima ili u hermetički zatvorenim kontejnerima, koji su posebno izrađeni za skladištenje takvih proizvoda, a skladište se u za to predviđenim i prilagođenim prostorijama koje se održavaju kako bi se obezbjedili dobri uslovi skladištenja i prevoze se odgovarajućim prevoznim sredstvima.

(2) Veterinarsko medicinski proizvodi skladište se u zasebnim, bezbjednim i zaštićenim prostorijama, te prostorije moraju da budu dovoljne veličine i pravilno identifikovane, kako bi se omogućilo uredno skladištenje različitih veterinarsko medicinskih proizvoda.

(3) Za skladištenje istekle, povučene ili vraćene medicinirane hrana za životinje i intermedijarnih proizvoda određuju se posebni objekti.

(4) Kontejneri u vozilima koja se koriste za prevoz medicinirane hrana za životinje i intermedijarnih proizvoda čiste se nakon svake upotrebe kako bi se izbjegao svaki rizik od unakrsne kontaminacije.

Dio 6

Vođenje evidencije

(1) Subjekti u poslovanju hranom za životinje koji proizvode, skladište, prevoze ili stavljaju na tržište medicinirana hranu za životinje i intermedijarne proizvode vode evidenciju sa relevantnim podacima koji uključuju pojedinosti o kupovini, proizvodnji, skladištenju, prevozu i stavljanju na tržište radi efikasne sljedljivosti od prijema do isporuke, uključujući izvoz do konačnog odredišta.

(2) Evidencija iz stava 1 ovog Priloga sadrži:

1) dokumentaciju o HACCP-u;

2) plan kontrole kvaliteta iz stava 4 ovog Priloga i rezultate odgovarajućih kontrola;

3) specifikacije i količine veterinarsko-medicinskih proizvoda sa navedenim brojem šarže, hraniva, krmne smješe, dodataka hrani za životinje, intermedijarnih proizvoda i medicinirane hrane za životinje koji su kupljeni;

4) specifikacije i količine proizvedenih šarži medicinirane hrana za životinje i intermedijarnih proizvoda, uključujući veterinarsko-medicinske proizvode sa navedenim brojem šarže, hraniva, krmne smješe, dodataka hrani za životinje i intermedijarne proizvode koji su upotrijebljeni;

5) specifikacije i količine šarži medicinirane hrana za životinje i intermedijarnih proizvoda koje su skladištene ili prevezene;

6) specifikacije i količine medicinirane hrana za životinje i intermedijarnih proizvoda koji su stavljeni na tržište ili izvezeni u treće zemlje, uključujući i jedinstveni broj veterinarskog recepta za mediciniranu hranu za životinje;

7) informacije o proizvođačima ili dobavljačima medicinirane hrana za životinje i intermedijarnih proizvoda ili proizvoda upotrijebljenih za proizvodnju medicinirane hrana za životinje i intermedijarnih proizvoda, uključujući barem njihovo ime/naziv, adresu i, ako je primjenjivo, broj odobrenja;

8) informacije o primaocima medicinirane hrana za životinje i intermedijarnih proizvoda, uključujući barem njihovo ime/naziv, adresu i, ako je primjenjivo, broj odobrenja; i

i. informacije o veterinaru koji je izdao, veterinarski recept za mediciniranu hranu za životinje, uključujući ime i adresu tog veterinara.

(3) Dokumenti se čuvaju u evidenciji najmanje pet godina od datuma njihovog izdavanja.

Dio 7

Žalbe i povlačenje proizvoda

(1) Subjekti u poslovanju hranom za životinje koji mediciniraju hranu za životinje i intermedijarne proizvode stavljaju na tržište uspostavljaju sistem za registrovanje i obradu žalbi.

(2) Subjekti u poslovanju hranom za životinje uspostavljaju sistem za hitno povlačenje sa tržišta medicinirane hrane za životinje i intermedijarnih proizvoda i prema potrebi, za povlačenje medicinirane hrane za životinje i intermedijarnih proizvoda iz distribucijske mreže u slučaju da ne ispunjavaju zahtjeve ove uredbe, i pisanim putem utvrđuju odredište za povučene proizvode, a prije nego što takve proizvode opet puste u promet, subjekti u poslovanju hranom za životinje izvršavaju ponovnu kontrolu kvaliteta kako bi se obezbjedilo da su ispunjeni bezbjedni zahtjevi za hranu za životinje.

Dio 8

Dodatni zahtjevi za pokretne mješaonice

(1) Pokretne mješaonice moraju u vozilu da imaju dostupan primjerak sljedećih dokumenata na službenom jeziku države u kojoj se odvija proizvodnja medicinirane hrana za životinje:

1) odobrenje pokretne mješaonice za proizvodnju medicinirane hrana za životinje, koje je izdao nadležni organ države u kojoj je pokretna mješaonica odobrena;

2) dokumentaciju o HACCP-u;

3) plan kontrole kvaliteta iz stava 4 ovog Priloga;

- 4) plan čišćenja iz stava 1 ovog Priloga;
5) popisa lica odgovornih za proizvodnju medicirane hrane za životinje iz stava 2 ovog Priloga.
- (2) Pokretne mješaonice preduzimaju sve odgovarajuće mjere predostrožnosti da bi se spriječilo širenje bolesti, a vozila koja se upotrebljavaju za proizvodnju medicirane hrane za životinje čiste se nakon svake upotrebe za proizvodnju medicirane hrane za životinje kako bi se izbjegao svaki rizik od unakrsne kontaminacije.
- (3) Ako su na raspolaganju brojevi registarskih oznaka vozila, pokretne mješaonice upotrebljavaju samo ona vozila čiji su brojevi registarskih oznaka dostavljeni nadležnom organu.

PRILOG 2

AKTIVNA SUPSTANCA

- 1) Amoksisicilin
- 2) Amprolijum
- 3) Apramicin
- 4) Hlortetraciklin
- 5) Kolistin
- 6) Doksiciklin
- 7) Florfenikol
- 8) Flumekin
- 9) Linkomicin
- 10) Neomicin
- 11) Spektinomycin
- 12) Sulfonamidi
- 13) Tetraciklin
- 14) Oksitettraciklin
- 15) Oksolinska kiselina
- 16) Paromomicin
- 17) Penicilin V
- 18) Tiamulin
- 19) Tiamfenikol
- 20) Tilmikozin
- 21) Trimetoprim
- 22) Tilozin
- 23) Valnemulin
- 24) Tilvalozin

PRILOG 3

POSEBNI ZAHTEVI ZA OZNAČAVANJE

(1) Na oznaci medicirane hrane za životinje i intermedijarnih proizvoda navode se sljedeći podaci na način koji je jednostavan, jasan i lako razumljiv krajnjim korisnicima:

1) izraz "medicirana hrana za životinje" ili "intermedijarni proizvod za proizvodnju medicirane hrane za životinje", u zavisnosti od slučaja;

2) broj odobrenja subjekta u poslovanju hranom za životinje odgovornog za označavanje, u slučajevima kada proizvođač nije subjekt u poslovanju hranom za životinje odgovoran za označavanje dostavlja se sljedeće:

- naziv ili naziv poslovnog subjekta i adresa proizvođača; ili
- broj odobrenja proizvođača;

3) aktivne supstance sa navedenim nazivom i dodanom količinom (mg/kg) i veterinarsko-medicinski proizvodi sa brojem odobrenja za stavljanje u promet i nosiocem odobrenja za stavljanje u promet, pod naslovom "lijekovi";

4) sve kontraindikacije veterinarsko-medicinskih proizvoda i štetni efekti, ako su ti podaci nužni za upotrebu;

5) u slučaju medicirane hrane za životinje i intermedijarnih proizvoda namijenjenih za životinje koje se koriste za proizvodnju hrane, karenca ili oznaka "nema karence";

6) u slučaju medicirane hrane za životinje namijenjene za životinje koje se ne koriste za proizvodnju hrane, osim za krznašice, upozorenje da je medicirana hrana za životinje namijenjena samo za liječenje životinja i upozorenje da se mora držati izvan vidokruga i dohvata djece;

7) besplatan telefonski broj ili drugo prikladno sredstvo komunikacije, kako bi se držaocu životinja omogućilo da uz obavezne pojedinosti dobije i uputstva o proizvodu za svaki veterinarsko-medicinski proizvod;

8) uputstva za upotrebu u skladu veterinarskim receptom za mediciranu hranu za životinje i sažetak opisa svojstava proizvoda;

9) minimalni rok trajanja, kojim se uzimaju u obzir rokovi trajanja veterinarsko-medicinskih proizvoda i koji je naznačen

formulacijom "upotrijebiti do..." iza koje slijedi datum, i posebna uputstva za skladištenje, prema potrebi;

10) informaciju o tome da je neodgovarajuće zbrinjavanje medicinirane hrane za životinje ozbiljna prijetnja za okolinu i da, u određenim slučajevima, može doprinijeti antimikrobnoj rezistenciji.

(2) Tač. od 1 do 10 stava 1 ovog Priloga ne primjenjuju se na pokretne mješaonice koje isključivo proizvode mediciniranu hranu za životinje i ne isporučuju sastojke.

PRILOG 4

DOPUŠTENA ODSUPANJA U OZNAČAVANJU SASTAVA MEDICINIRANE HRANE ZA ŽIVOTINJE ILI INTERMEDIJARNIH PROIZVODA

Dopuštena odstupanja utvrđena u ovom prilogu uključuju samo tehnička odstupanja.

Ako se utvrdi da sastav medicinirane hrane za životinje ili intermedijarnih proizvoda odstupa od količine antimikrobne aktivne supstance navedene na oznaci, primjenjuje se dopušteno odstupanje od 10%.

Za druge aktivne supstance primjenjuju se sljedeća dopuštena odstupanja:

Aktivna supstanca po kg medicinirane hrane za životinje ili intermedijarnih proizvoda	Dopušteno odstupanje
> 500 mg	± 10%
≤ 500 mg	± 20%

PRILOG 5

VETERINARSKI RECEPT ZA MEDICINIRANU HRANU ZA ŽIVOTINJE

Veterinarski recept za mediciniranu hranu za životinje sadrži:

- 1) puno ime i podaci za kontakt veterinara, uključujući, ako postoji, broj ovlaštenja;
 - 2) datum izdavanja, jedinstveni broj recepta, datum isteka recepta (ako je valjanost kraća od one iz člana 7 ove uredbe) i potpis ili jednakovrijedan elektronski oblik identifikacije veterinara;
 - 3) puno ime i podaci za kontakt držaoca životinja i, ako postoji, identifikacijski broj objekta;
 - 4) identifikacija (uključujući kategoriju, vrstu i dob) i broj životinja ili, zavisno o slučaju, težina životinja;
 - 5) dijagnostifikovana bolest za koju je potrebno liječenje. U slučaju imunoloških veterinarsko-medicinskih proizvoda ili antiparazitika bez antimikrobnog efekta, bolest koju treba spriječiti;
 - 6) oznaka (naziv i broj odobrenja za stavljanje u promet) veterinarsko-medicinskog proizvoda ili veterinarsko-medicinskih proizvoda, uključujući naziv aktivne supstance ili aktivnih supstanci;
 - 7) ako je veterinarsko-medicinski proizvod propisan u skladu sa propisima kojim se uređuju lijekovi, izjava o tome;
 - 8) stopa uključivanja veterinarsko-medicinskog proizvoda ili veterinarsko-medicinskih proizvoda i aktivne supstance ili aktivnih supstanci (količina po jedinici mase medicinirane hrane za životinje).
 - 9) količina medicinirane hrane za životinje;
 - 10) uputstvo za upotrebu za držaoca životinja, uključujući trajanje liječenja;
 - 11) postotak medicinirane hrane za životinje u dnevnom obroku ili količina medicinirane hrane za životinje po životinji i po danu;
 - 12) za životinje koje se koriste za proizvodnju hrane, karenca, čak i ako je ona nula;
 - 13) sva upozorenja potrebna kako bi se obezbjedila pravilna upotreba, među ostalim, kada je to relevantno, kako bi se obezbjedila racionalna upotreba antimikrobnih sredstava;
 - 14) za životinje koje se koriste za proizvodnju hrane i krznašice, napomena "Ovaj recept ne smije se ponovno upotrijebiti".
- (2) Sljedeće podatke popunjavaju Dobavljač medicinirane hrane za životinje ili mješaonica na poljoprivrednom gazdinstvu, u zavisnosti od slučaja popunjavaju sljedeće podatke:
- naziv ili naziv poslovnog subjekta i adresa;
 - datum isporuke ili datum miješanja na poljoprivrednom gazdinstvu;
 - broj šarže medicinirane hrane za životinje koja se isporučuje na temelju veterinarskog recepta za mediciniranu hranu za životinje, osim u slučaju mješaonica na poljoprivrednom gazdinstvu;
 - potpis dobavljača koji snabdijeva držaoca životinja ili mješaonice na poljoprivrednom gazdinstvu.